

TE RIPEKA WHERE.

Ki te haere te ope ki te whawhai, ko te tino whakaaro ko te patu tangata. I pataia e rōiāni Paraiti (John Bright), "He aha te whawhai?" Naana ano i whakahoki tana patai. I mea ia "Ki taku whakaaro, he hawhe o nga tangata e korerorero ana mo te whawhai kaore i te mohio he aha te whawhai. Ki te whakapotoa te whakahoki ka penei:—Ko te huihuinga, ko te tutakitanga o nga wehi katoa, o nga kino, o nga kohuru, o nga mamaetanga e taea e te tangata i tenei ao."

He kino te whawhai, engari ra he kino atu te whaka-taurekarekatia, te whakamamae-roatia o te tangata e nga ture kino.

E hau mai nei nga rongoro o te rau o te patu i Awherika. Ko te hinga anake, ko te mate te tangata te tino korero e taria ana e te taringa.

Haere ana nga ope patu tangata ki whawhai haere ana ano hoki te ope whakaora i te tangata—whakaora, tiaki i nga turoro, i nga taotu o te ope e huaina nei ko te Ripeka Where (Red Cross). Te hoari a tenei ope he maripi i te tapatapahi i te mate, hei tango i te mata, hei tapahi i te ringa i te waewae ranei; ta ratou na paura he rongoro; ta ratou na haki ko te Ripeka Where—ko te ripeka o te Karaiti; nga apiha o tenei ope he takuta; nga hoia he wahine—he wahine tiaki turoro no nga hohipera. E tohungia ana tenei iwi me o ratou taonga katoa ki te ripeka where. Ko nga takuta, me nga wahine e whakapiria ana te ripeka where ki o ratou kakahu. Ka ahei ratou ki te haere ki nga wahi katoa o te whenua o te whawhai; ki te kitea te ripeka where i runga i a ratou e kore rawa tetahi tangata e tika kia pa atu te ringa ki a ratou. He tima ano o ratou, he tereina, he teneti hei hohipera, he wakana hei hari turoro; e tohungia katoatia ana ki te ripeka where. I te mutunga iho o nga pakanga ka haere a ratou wakana ki te kohikohi i nga taotu, ka mau mai ki roto i o ratou teneti rongoro ai, whaka-hemohemo ai ranei. Ki te tupono mai he taotu no te hoari o kore e kapea. I etahi wa ka te utaina i nga taotu ki runga i a ratou tereina ka mauria mai i te tuawhenua ki te tahatai kia mauria e nga tima ki nga tino hohipera i nga taone nunui, ki Ingarangi rawa ranei. Nui atu te Ope Ripeka Where hei Taranawaara inaianei, no Ingarangi, no Amerika, no Ahitereiria.

He tokomaha nga wahine o Niu Tirenī nei kua uru kei roto o taua ope. Tetahi wahine hei Taranawaara inaianei he tino rangatira no Ingarangi.

He tokomaha o te ope o te Ripeka Where kua mate i tenei whawhai. Ki nga iwi rangatira he mea tapu rawa te Ripeka Where, tena ki te Poa e takahia ana. I tetahi takuta e titiro ana ki te mate o tetahi Poa taotu, ka puhia ake e te Poa, mate rawa. I etahi wa ka mau te Poa ki te Ripeka Where hei tinihanga kia kore ai e puhia. He iwi tutua.

He whakaatu noa tenei kia mohio ai te Iwi Maori ko nga ope e haere ana ki Taranawaara ehara i te mea mo te patu tangata anake, engari he ope ano mo te whakaora tangata ara ko te ope o te Ripeka Where. E te pakeha! E te pakeha! Na wai hoki te patu, na wai hoki te whakaora!

R. T. M. K.

**ETAHI KORERO O TE AO.**

E kore te Pirinihi o Weiri e tae ki te whakapuaetanga o te whakamatakitaki nui ki Parihi, te tino taone o te Wiwi. Ko te take i kore ai ia e haere, he ahua kino no te Wiwi ki te Ingarahi, he korero kino hoki mo tona whaea mo te Kuini. E kiki tonu ana nga nupepa a te Wiwi i nga korero kino mo te Ingarahi.

I roto i tenei rau tau e 52 nga Motu i hu ake i te moana; 19 o aua motu kua ngarano, 10 hoki kei te nohoia e te tangata inaianei.

Tera te Kingi o Pahia e tae ki Ingarangi i tenei tau. Ka whakamanuhiritia ia e te Kuini.

Ko nga waro katoa e tahuna ana i Ranana i te tau kotahi 18,000,000 tana.

E taaketia ana nga hainamana katoa e tae mai ana ki Niu Tirenī nei, haunga nga mea kua tae mai i mua atu o te paahitanga o tenei ture. Ko te utu ma te hainamana kotahi, £100. I te taenga mai o tetahi tima ki Ponake (S. S. Indrilema), he hainamana nga kai mahi o runga, ka onaoma etahi, tokotoru. Rapu noa nga pirihimana kore rawa i kitea; heoi utu ana te Kamupene o taua tima i te £300.

I te horonga o tetahi maina waro i Amerika 100 nga tangata i tanumia. Tokorua tonu o aua tangata i taea oratia, ko etahi i mate katoa.